

Glaumbær ⁽¹⁾

Það er fornbylí og hefur verið í hvammi litlum örskammt suður frá túni Sigluness. Byggðarstæði er hlýlegt fagurt, byggðaleifar skýrar og garður forn um fremur lítið tún, fjórar dagsláttur.

Af staðháttum mætti ætla að sameign hafi lönd þessara býla verið og Glaumbær hjáleiga frá öndverðu. Líklegra er þó að sjálfstætt býli hafi hann verið í fyrstu og landsnyttjar haft inn frá bæ sem ólíkt meiri hafa þá verið en nú. Undir Sigluness virðist hann kominn á 14. öld og í eyði á 15. öld að sögn “í Plágunni” líklega síðari 1495. Stekkur hefir hér síðar verið og lambhús öðru sinni neðan við garðinn, kallast hér því Stekkir, þar sem bærinn var og Stekkjarvík niður frá bæ en Lambhústangi áður nefndur út og niður og Lambhúshólar tveir utan og sunnan við tún, sem réttnefndir væru *Ytri-Glaumbæjarhóll* (2) og *Syðri-Glaumbæjarhóll* (3) en víkin *Glaumbæjarvík* (4). Skálar litlar eru hér upp í Múlanum nær miðhlíðis eða stallar grónir. Nefnist *Ysti-Stallar* (5) út og upp frá bæ, *Mið-Stallar* (6) upp frá bæ og *Syðsti-Stallar* (7) suður og upp frá bæ. Vestan á háfjallinu eru hæðatoppar nokkrir er nefnst hafa *Gnúpar* (8) og dældahvolf milli þeirra *Gnúpaskálar* (9).

Nokkuð inn frá Glaumbæ er nestá nokkur fram frá hlíðinni nefnd *Geitanes* (10) og á því tóft ein nefnd *Geitakofi* (11) norðan við nesið er *Geitanesgil* (12) nær það upp á hábrún hlíðarinnar og er hæðarbunga þar sunnan þess nefnd *Geitaneshaugur* (13). Sunnan við Geitanes er vík með háum blásnum bökkum nefnd: *Vindbelgur* (14) og sunnan hennar *Vindbelgsnes* (15). Þar litlu innar byrja skriður þær er allt ná inn að Selabólgili í Staðarhólslandi og nefnast *Nesskriður* (16) er þar víðast allt undirlendi af brotið og þar með vegur, sem áður hefur hér verið svo skriður einar brattar eru úr fjalli ofan á sjávarbakka all háa og um þær aðeins fjárlóðir tæpar og oft ófærar þótt vel mætti góðan veg gera.

Fram úr skriðunum yst gengur melhöfði nefndur *Oddnýjarmelur* (17) og brekkuhvolf sunnan í honum *Oddnýjarbolli* (18). Þar framundan er flæðisker eitt nefnt *Skarfasker* (19). Litlu sunnar eru bergnibbur tvær er upp úr standa skriðunum neðst á sjávarbökkum nefnist hin ytri *Sigurðarsæti* (20) en hin syðri *Kollaklöpp* (21). Hefir alsagt verið að nöfn þessi séu frá 1613 þá hér fórust í snjóflóði að sögn 50 menn í jólanæturfæri að Siglunesskirkju, hafi Oddný náð á melinn og af komist en Sigurður og Kolli stöðvast á bergsnösnum þessum lifandi eða dauðir. Suður frá Kollaklöpp er gildrag niður úr skriðunum nefnt *Móhellugil* (22). Litlu sunnar gengur bergtangi fram í sjó svo ógengt er framan hans fram á hann gengur og hár og eggþunnur melkambur allt ofan úr skriðum er einnig torfært yfir hann neðan til svo slys hefir þar orðið nefnist hann *Hilluhryggur* (23) eða *Hölluhryggur* (24). Má ætla að Hillunafnið komið af flúðum þeim er fram undan honum ganga en Höllunafnið segir Jón fyrrum hreppstjóri á Hafsteinsstöðum einnig vera frá slysinu 1613. Hafi þá kona er Halla hét verið öftust í röð kirkjufólksins, sem vitað má að orðið hefir að feta eina tæpa slóð og því komist af, að hún var stödd á hrygg þessum. Neðan af fjöru að norðan er um tvö

skörð lítil fært upp á hrygginn. Nefnist hið efra *Uppganga* (25) en hið fremra *Tófugjá* (26). Skammt innar er og klettaneft fram úr bökkunum nefnt *Hrafnsnef* (27) og mætast þar lönd Nesjarða og Staðarhóls.

Stafrófsröð örnefna Glaumbær

- G -	-K -	-T -
Geitakofi (11)	Kollaklöpp (21)	Tófugjá (26)
Geitanes (10)	-M -	-U -
Geitanesgil (12)	Mið-Stallur (6)	Uppganga (25)
Geitaneshaugur (13)	Móhellugil (22)	-V -
Glaumbæjarvík (4)	-N -	Vindbelgsnes (15)
Glaumbær (1)	Nesskriður (16)	Vindbelgur (14)
Gnúpar (8)	-O -	-Y -
Gnúpaskálar (9)	Oddnýjarbolli (18)	Ysti-Stallur (5)
-H -	Oddnýjarmelur (17)	Ytri-Glaumbæjarhóll (2)
Hilluhryggur (23)	-S -	
Hrafnsnef (27)	Sigurðarsæti (20)	
Hölluhryggur (24)	Skarfasker (19)	
	Syðri-Glaumbæjarhóll (3)	
	Syðsti-Stallur (7)	